

San Pablo Efesolachi

ereca jun pila

Caque fiqui: Efeso duque inportante wa pueblo jominue. Junni Pablo junbi Diosichi fiquica micarinan, weyanlari Jesucristobe cayaica joto, culto quichun layaimin jominlanue. Junni Pablo yalaca nanni fécarí micarino munaratonan, yalachica manjino podeitunue. Pablo Diosichi fiqui micarinanun tenchi Roma pueblobi dorato, efésolachica manjino podeitunue. Junto in pilaca Diosichi Tencachi mantate quito, yalachica erenue efésolaca micarichun.

Pablo in pilabi Jesucristo niyan jonunca duque micarinue. Junsi duque comparasionbe micarinue: Jesucristo yachi tsachilachi misu cuwenta joeque, yalari yachi puca cuwenta joeque micarinue. Yucanbe quera quicaaminla cuwenta jolajoyoequenán micarinue. Junsi Jesucristobe yachi tsachilabe layaito Diosichi ya cuwenta jolajoyoequenán micarinue. Diosichi to tsachila joto, Diosichi familiara cuwenta jolajoyoequenán micarinue. Pablo in pilaca wata 60 tsansite chutenue.

1 ¹La Pablo nulabe duque saludainayoe. Diosi laca wenteca joe yape Crístochi mantá tan nenasa. Nulanan Jesucristobe pecayaicala joto, Diosichi tsachila jolajoe. ²Chiquilachi Apa Diosibe Miya Jesucristobe nulaca laquirato, pansí chusa carisa tenjae yape wepanatuto chularasa.

Miya Diosica se tinola jonunca

³Apa Diosiri chiquilachi Miya Jesucristochinan Apa joe. Yaca duque se tintsan joe. Chiquila Crístochi tsachila joto, Diosichi to tsachila jolajoyoe. Junbi chiquilachi tenchi duque seca joe. ⁴Diosiri toca caquituminnan, chiquilaca, yaca quereino junlaca, wenteca jominue. Chiquilaca wenteca jominue yape yachi sen tsachila joto yachi cate ti culpanantiya iton nenalarasa. ⁵Chiquilaca na caitusanan, Apa Diosi chiquilaca duque laquirato wentenue yape Jesucristoca quereiminla joto, Diosichi nalala cuwenta jolajosa. Diosi yachi tenca munate tenca cato, chiquilaca Yachi nalala jolajochunae tinue. ⁶Chiquila Diosichi munatinun Naochi tsachila

jonan, Diosi chiquilaca duque laquirato, chiquilaca senla joe timinhe. Junto chiquilaca wentenue yape Diosi duque laquiramin jonan yaca sen joe latisa. ⁷Ya Nao yachi Apachi mantate puyato, asan larito, chiquilaca se larito cuwae. Chiquilachi jutsaca piyarito se larito cuwae. Chiquilaca duque laquirato perdonaicae.

⁸⁻⁹Matu male nechi Diosi ticatiya quino tenca canaminue. Cristo ticatiya quino jominue. Junni casale tsachilari junca miitominlanue. Amanari chiquilaca laquirato jera micaricae. ¹⁰Jun micarica jun fiqui itsanque joe: Cristo mantano ma fenunbi, piyanlelaca mantachunae. Jerale layaito jamochi chuminlanan, tote chuminlanan, Crístobesiri mantailaichunae.

¹¹⁻¹²Diosiri yachi tenca munate niyantiya quiniquimin joe. Aman chiquila israelítala casale Crístoca quereimin jolajoyoe. Junni Diosi chiquilaca matu male nechi wenteca joto mantanue yape chiquila Crístocho joto yaca duque sen joe tito nenalarasa. Yari duque seque mantamin joe. ¹³Junni nulanen israelita itonlanan jun sen fiquica meralaquinue. Jun tsarasi fiqui nulaca se lolaichunaeque paca joe. Junni nulanen Crístobe cayailainue. Aman junni Diosi mantimini paca jominue Crístoca quereiminlachibi yachi Tencaca wisa carino joyoeque. Junto nulachi tencabinan yachi Tencaca ereca joe yape nula jeralela Diosichi jolajoyoeque miralarasa. ¹⁴Chiquila amanari Diosichi Tencaca nasiri tato miintsan joe Diosi chiquilachi jera ticatiya cuwachunaeque. Ticatiya senca cuwachunae yape chiquila yaca Duque sen joe latisa. Junni Diosichi Tencari cala antisipaquica cuwenta joe. Jun calaca nasiri tato miintsan joe jerale calaca cano joyoeque.

Pablo Jesucristoca quereiminlachi tenchi rocaínunca

¹⁵Nulaca meráto, Diosibe acradeseimanyoe. Nulari Miya Jesube cayaicala joto, jerale yachi tsachilaca laquiralaraeque meráyoe. Junni junca meracale nechi ¹⁶la numasitiya Diosibe rocaínato, nulacanan mantenhto nulachi tENCHINAN Diosibe peacradeseimin joyoe. ¹⁷Diosi nulaca duque mi carisa rocaímin joyoe. Yari chiquilachi Miya Jesucrístocho tsara sen Apa joe. Junni nulachi tencabi yaca duque mirasa carideque rocaímin joyoe yape yaca seque entendeilaisa. ¹⁸⁻¹⁹In fiquica miisa rocaínayoe. Diosi nulaca yabe cayaisa tinue yape yachi jolajosa. Aman Diosi yachi tsachilachi duque senca cuwachunae. Junni nulanen jun senca seque tenca cato meralarae. Junni Diosi miituntsancari sonban joto, yaca quereiminlaca jun sonbabe se suwachunae. Aman lari Diosibe duque rocaímin joyoe yape nula ya fiquica jera miilaisa.

²⁰Junni Diosi chiquilachi tenchi sonban joto, jun sonbabenan Cristo puyacaca mansonhisa carito, jamochi mantanloto yachi tsa tede nanchi chuteto tae. ²¹Jerale mantá tanlacatiya ya fécarí mantá tan joe. Ti felacatiya fe mantá tan joe. Amana mantá tanlaca, o uyan mate mantá

tano junlacanan ya fe mantá tan joe. ²²⁻²³Diosi Crístoca jeralelaca mantá tan suwanue. Junsi yachi tsachilachi Miya suwanue. Crístori jera sen quimin joe. Tsan jotonan, yachi tsachila itonari, yanán cafalta jochunae. Jana tsachi puca cuwenta jochunae. Tsachilachi misu jera pucaca mantamin joe. Chiquilachi misubi tenca janunca tede o nede wecariminla joyoe. Junni Cristo jun tsanquenán yachi tsachilaca mantamin joe misu cuwenta.

Diosi tsachilaca laquirato se larimin jonunca

2 ¹Nulari jutsa quiminla joto, tenca puyaca cuwenta jominlanue. ²Casaleri Diosica tennatuminla joto, jutsa quito nenamin jominlanue. Yucanca merámin jominlanue. Ya in tote nenamin ocolachi miya joto, seiton tsachilachi tencaca yucapiyarimin joe yape Diosica meralaquitusa. ³Junni chiquilari jeralelanan jun tsanquenán nenamin jominlayoe. Tenca munate nenato, ti niyan quino muquiniatiya quiniquimin jominlayoe. Junni chiquilanan uyanla tsanquenán paimin jominlayoe. ⁴⁻⁵Jutsaca quiminla joto, tenca puyaca cuwenta jominlayoe. Diosi mantimini duque laquiramin joe. Junni chiquila Crístobe cayainán, chiquilachi tenca puyaca cuwenta jominca mansoncarie. Chiquila seiton jominlaca Diosiri chiquilaca laquichi se larinue.

⁶Junni chiquila Jesucrístochi jonun tenchi Diosi chiquilaca Crístobe mansonhisa carito, Crístobe pechumin cuwenta suwanue. Diosichi to tsachila joto, Crístochi tsa tede nanchi pechumin cuwenta jolajoyoe. ⁷Diosi chiquilabe jelecari sen joe Jesucrístochi jonun tenchi. Junto chiquilaca Jesucrístobe chumin cuwenta suwanue yape uyanlanan tenhilaisa ya duque laquiramin joeque. Numatotiya junca quirawonato polechunae.

⁸⁻⁹Diosi chiquilaca laquichi se larinue Jesucrístobe cayaica jonun tenchi. Junni tenca mánta se lolaitiyoe. Sen jochique tenfenatonán, tenca mántari natiya se lono podeilaituanae. Tsan josanan, epe cuwanique cuwenta Diosi chiquilaca laquirato se larinue yape monantiya uyanlaca fe sen jolajoyoe tilatitusa. ¹⁰Diosi chiquilaca jera casan suwanue. Jesucrístochi jonán chiquilaca sen suwanue yape seque nenalarasa. Chiquilari na caitusanan Diosi junca paca jominue chiquila niaque sen jonola jonunca.

Israelítalabe israelita itonlabeca man parejori suwanunca

¹¹Junni nula israelita itonlabe itsanque cuenta quechinayoe: Israelítala yalachi quidoca poreminla joe. Diosichi tsachilayoe tito tsanque poreminla joe. Junto israelítala nulaca epe joe tito porecaica itonla joe timinla joe. Nulaca Diosichi tsachila itolajoe timinla joe. ¹²Junni nulaca tsantintsan jominue. Crístochi caitominlanue. Diosi wenteca

israelita tinunlabe peitominlanue. Diosi israelítalaberi trato quito, nulabe trato pequica itominue. Niyaquenantiya se lono itominlanue. In tote Diosi caquiraca iton cuwentanan chuminlanue. ¹³Amanari wari nulari Jesucrístochi joto, uyan quiraque manjolajoe. Cristo yachi asanca larica jonun tenchi nulanán Diosichi pejolajoe.

¹⁴Ya chiquilaca jera sen suwanue. Israelítalabe israelita itonlabeca man junni suwanue. Casale pa nenalarasanan, ya pari serica cuwenta jominue chiquilachi quitsale. Junni Jesús jun serica cuwenta jominca balenue.

¹⁵Itsanque jominue: Ya puyato, israelítalachi matu mantaca epe suwanue. Junni israelítalanán, israelita itonlanán yachi tsachila joto, man junni jolajoyoe. Junni man junni joto, pataato nenano itolajoyoe. ¹⁶Corosibi puyato, ya pa jonunca piyarinue. Junsi israelítalacanan, israelita itonlacanan man parejori Diosibe se patarinue.

¹⁷Junni Cristo jatobi, jera merawosa carinue jera se patarinayoeque. Diosica miratuminlacanan, Diosica miraminlacanan Cristo tsanque jera merawosa carinue. ¹⁸Yachi tsachila joto, israelita itonlabenan, israelítalabenán Diosichi Tenca pun jolajoyoe. Junni yachi Tenca chiquilachibi wica jonán, jeralela Apa Diosichi queloino podeilayoe.

¹⁹Jeralela Diosichi tsachila icala joyoe. Junni amanari nulanán jeralela Diosichi icala joto, yachi to tsachila jolajoe. Yachi familiála cuwenta jolajoe.

²⁰⁻²²Jesucrístochi tsachila jeralela layaito, suca quica ya cuwenta jolajoichunae. Jesucristo patsa, yari caque chuteca su cuwenta jochunae. Ya quiminlari ya suca quirato miintsan jochunae ya seque quinanunca. Junni Crístochi mantá tanlanán, Diosichi mantate paminlanán, yalari jun ya tenchi simiento quica su cuwenta jolajochunae. Yala micarinanunca meráto seiminla joyoe. Junni nulanán Jesucrístochi joto, jun yabi su cuwenta pejolajoe. Diosichi Tenca nulachibi chusa, nula Diosichi ya cuwenta jolajoe yape Diosi nulachibi chusa. Junni jun yaca quinasanan, quinasanan, Miya Diosichi ya peilainayoe.

Pablo Israelita itonlaca micarimin joyoe tinunca

3 ¹Jun tenchi la Pablo Jesucrístochi tenchi, israelita itonlaca Diosichi fiqui micarinanun tenchi dorato, nulachi tenchi rocaimin joyoe.

²Nula meracala jonhoe Diosi laca laquirato wenteca jonunca. Laca wentenue yape nulaca jun sen fiquica micarisa. ³Ya sen fiquiri casalero miratunun jominue. Tsan josanan, junca Diosi patsa laca micarinue. Diosi niyaque laca micarinunca numa nasi pila quicayoe. ⁴Ya pilaca quirato laca tenhilaichunae Crístoca paca fiquica tuca miraeque. Laca ya miratunun jomin fiquica tuca miraeque tenhilaichunae. ⁵Junni ya fiquiri matu male nechiri miratunun jomin jotonán, amanari miranun ica joe. Crístochi mantá tanlanán, Diosichi mantate paminlanán, ya fiquica

miralarayoe. Diosichi Tenca chiquilachi tencabi wica joto micarie. ⁶Junni ya sen fiqiri itsanque joe: Israelita itonlanan Diosichi tsachila pejono podeilaichunaeque. Nanni matunan Diosi trato quica jominue yachi tsachilaca se larichun. Junni amanari israelítalasiri Diosichi tsachila itolajoyoe; israelita itonlanan Jesucristobe cayaitori yachi tsachilanan pejolajoe. Jeralela man bolonni jolajoyoe israelítalabe israelita itonlabe.

⁷Diosi laca laquirato, sonba suwato, ya sen fiqica micarisa mantá tan suwacae. ⁸Jerale Diosichi tsachilale nechi la fe epe tsachi jonun cuwenta joyoe. Tsan jomincanan laca duque laquirato in mantaca cuwae yape israelita itonlaca micarisa. Lari Cristo miratuno quiracari sen joeque micarino joyoe. ⁹Diosi ticatiya jera quimin joto, yasiri jun fiqica numari male nechi miramin jominue. Amana mantimini jeralelaca tuca micarino joyoe. ¹⁰Junni mantamin anjelila jeralela, ti jamobi chuminlatiya, Cristo se laricalaca quiralaquichunae. Yalaca quirato tenhilaichunae Diosiri tsaracari tenca tan joeque. ¹¹Casale casaleri Diosi numatotiya tsan josa carino tenca cato, duque duque wata polenunbi chiquilachi Miya Jesucristoca tsannan josa carinue. ¹²Yabe cayaica joto, Apa Diosibe cuenta quino natiya lurano itolajoyoe. ¹³Junto la nulachi tenchi padeseinaeque pele tenca ilaituna! tiyoe. Junca son jonola joe.

Pablo Efésolachi tenchi Diosibe rocaínunca

¹⁴Jun tenchi Apa Diosichi cale telenhito rocaimin joyoe. ¹⁵Diosiri yachi tsachilachi Apa joe. Yachi tsachila jeralela Diosichi tobi chuminlanan, in tote chuminlanan, yachi familia la jolajoyoe. ¹⁶Junto yabe rocaimin joyoe yape yari tsaracari sen mantá tan joto, yachi Tenca nulachi tencaca sonba suwasa. ¹⁷Nulaca sonban tenca suwasa rocaínayoe yape Cristo nulachi tencabi chusa. Yaca tennanari, nulachi tencaca cuidaichunae yape sonban tenca joto, beco beco laquiracaato sonnalarasa. ¹⁸⁻¹⁹Tsanque sonnaminla jotori, fe seque miiminla jochunae. Nulaca jerale Diosichi tsachila cuwentanan miino podeilaisa rocaínayoe Crístori duque laquiramin joeque. Cristo nisicari laquiranuncatiya monantiya jera sele entendeino podeitulajoyoe. Tsan jototiya, tsaracari laquiramin joequeri miintsan joe. Junni tsanque mirasa rocaínayoe yape Diosi nulachi tencabi jera seque chusa.

²⁰Diosi yachi sonbabe chiquilaca duque ayudaimin joe. Chiquila titiya quisa rocaínari, yari jun rocaicaca fe duquenán quino podeimin joe yachi sonbabe. Yari ticatiya quino joeque tenca canasanán, yari fécarí duquenán quinquino podeimin joe. ²¹Junni Jesucristobe yachi tsachilabe Apa Diosica quirawonola joyoe ya duque sen patsa joeque miilaisa. Numatotiya yaca sen joeque quirawoto polentsan joe. Tsanque joe.

Diosichi Tencari chiquilaca man tencari suwaca jonunca

4 ¹Junni la Miya Jesucristochi mantate nenanun tenchi dorato, nulaca payino muquee. Nulaca yabe cayaisa tinue yape tsara seque

nenalarasa. Junni tsanquenana seque nenalarana! ²Uyanlaca fe joyoequeri tenca calaquituna! Niyan quilaquinasatiya, pailaituna! Laquiracaato wantailaina! ³Diosichi Tencari chiquilaca man junni suwaca joe.

Junni tinantiya pacaatuto, man parejori tenca cato nenano tenfelaina!

⁴Crístochi tsachilari man bolonni jolajoyoe. Diosichi Tencari mancasiri Tenca joe. Diosi chiquilaca yabe cayaisa tica joe yape chiquilaca se larino jonunca tenca cato meralarasa. Junni jeralela man parejori tenca cato, junca meralarayoe.

⁵Jesucrístori mancasiri Miya joe. Chiquila quereinun fiqinan man fiqisiri joe. Jeralela jun tsanquenana mumunhicalayoe.

⁶Diosiri mancasiri joe. Ya jerale yaca quereiminlachi Apa joe. Yari jeralelaca mantamin joto, jeralelaca ayudaimin joto, jeralelachibi joe.

⁷Chiquila jeralela man bolonni jotonan, man quiraque man quiraque quiminlayoe. Cristo chiquilaca duque laquirato, mancachi mancachi uyan quiraque mantá cuwae yape ticatiya quino podeilaisa. Epe cuwanique cuwenta jun mantaca chiquilachi cuwaca joe. ⁸Diosichi Pilabi junca itsanque chuteca joe:

Yari jamochi manloto, jeralelachi tenchi fe lonue yape doramin cuwenta sonnalaratusa.

Junto tsachilachi ticatiya epe cuwanueque chuteca joe.

⁹Junni Crístoca manlonue tinari, casale toca patato puyato menaica jomin jonhoe. ¹⁰Junni ya patamin, yanan jamochi manlonue. Yoquido banachi lonue yanan jeralete perachun. ¹¹¿Junni tsachilachi ticatiya epe cuwanue tinatun? Itsanque joe: Mancachi mancachi epe cuwanique cuwenta mantaca cuwaca joe. Weyanla Crístochi mantá tanla, weyanla Diosichi mantate paminla, weyanla Jesucrístobe cayaisa cariminla, weyanlari Jesucrístobe penenaminla tala cuidaiminla, weyanla micariminla, jolajosa mantá cuwaca joe. ¹²Yalachi tsanque mantá jera cuwaca joe yape Diosichi tsachilaca ayudaito nenalarasa, yalanan Diosica tenca cato ticatiya quito seque nenalarasa. Tsanque nenato, puca uwainun cuwenta Crístochi bolon tsachila jera layaito fe sonban tenca ide ide jilaiyanae. ¹³Jera sonban tenca itobi, aman jeralela jun tsanquenana seque quereimin icaichunae. Jeralela Diosichi Naoca seque miramin icaichunae. Jeralela jera sen itobi, aman Cristo cuwenta jolajoichunae. Junbi aman uwanla cuwenta jolajoichunae.

¹⁴Junni wari na cuwenta itocaichunae. Nalalari tenca itoto nene fiqicanan se jonijoe tito quereinilaichunae. Seiton nene pamin tsachilari nalalabe otoque pato, encanano podeilaichunae. ¹⁵Chiquilari wari nalala cuwenta itonola joyoe. Chiquilari laquiracaato, tsarasi fiqica meráto nenalarasa! Junni tsanhinato, nalalachi puca uwainun cuwenta, chiquilachi tencabinan Cristo cuwenta ide ide jilaiyanae. Junsi yari chiquilachi misu cuwenta joe. ¹⁶Chiquilari yachi puca cuwenta jolajoyoe. Aman tsachilachi pucaca tenca calaquede! Chide bun tala tulaito, junsi

pecolo, tenca, quefo, titiya seque inari, pucanan seque uwaichunae. Junni Jesucristochi tsachilari jun cuwenta jolajoanae. Chiquila tala laquiracaato, ayudaicaato, man junni joto nenasa, yari chiquilaca fe seide seide jisa carichunae.

Jesucristochi tsachila joto, casan tala mannenanunca

¹⁷Aman junni Miya Jesucristochi mantate nulaca payichinayoe: Amanale nechí Diosichi tsachila itonla cuwenta nenatulajona! Diosichi tsachila itonlari tenca itonla joto, ¹⁸epele tenca caminla joe. Diosica merátuchi timinla joto, Diosica miitolajoe. Junto Diosica miitoto, Diosibe natiya peitolajoe. ¹⁹Yalari duque jutsa quintonan, jutsa quinayoeque tenhituminla joe. Ti quiracari seiton quito nenatonan, nantanancari quichi timinla joe. ²⁰Crístori nulaca tsan quira quito nenano micarítue. ²¹Nulari Jesuca meráminla joe. ¿Yabe tsarasi fiquica miicala joco? ²²Junni unica camisaca manlarinun cuwenta, seiton tenca canunca mantelaquepolaque! Casale nulari tsanque seitonque nenamin jominlanue. Seiton quinoca tenca cato, tenca mántanan epele tenca cato, seiton ica jominlanue. ²³Junni nulari nulachi tencabi mancanbiyaito, seque tenca mancalaquina! ²⁴Junsi aman casan camisaca manponun cuwenta casan tenca manhilaina! Diosi chiquilaca casan tenca suwanae yape ya cuwenta jolajosa. Tsanhitori, yachi sen tsachila jocaichunae.

²⁵Chiquila jeralela man bolonni jotori, jeralelanan nene patuto, tsarasica cuenta quintsan joe.

²⁶Pansile pataatori, yo cawitusanan manse patilaina! jutsa quituchun. ²⁷Yucan nulaca jutsa quisa munarasanan, nulari tina jutsa quilaquituna! ²⁸Tarinmin jomin jototiya, natiya mantarinno itolajoe. Trabajaquintsan joe. Tedechi senca quintsan joe. Tsanlaquitori poperelachinan ticatiya senca cuwato ayudaino podeilaichunae.

²⁹Seiton fiquica palaquituna! Tencabe pato, tsachila meráno jonun fiquica palaquina! Sen fiquicasiri palaquina! yape meráminla fe seque tenca calaquisa. ³⁰Diosi yachi sen Tencaca nulachi cuwae yape yachi jolajoyoeque tenhilaisa. Nulaca yachica tanlono fecári yachi Tencaca nulachibi pechusa carie. Junni nulari Diosichi Tencaca tina laqui suwalaquituna!

³¹Nulari pataato, pacaato nenamin jominlanue. Seitonque nenamin jominlanue. Yucacuramin jominlanue. Junni amanari wari tsantinola itoe. ³²Seque nenato, beco beco laquiracaantsan joe. Jesucristochi jonan, nulaca Diosi perdonainue. Junni nulanun jun tsanquenun perdonacaaliquina!

Diosichi tsachila itsanque nenanola jonunca

5 ¹Diosi laquiranun nalala jotori, ya cuwenta nenalarana! ²Cristo chiquilaca laquiramin joto, tencachiquenan Diosichi cuwapoito

puyanue chiquilachi jutsa tenchi. Tsanque cuwapoito, Diosichi tsara uraran pubanca epe cuwaca cuwenta jominue. Junni Crístonan nulaca laquiramin jonun tenchi nula talanan laquiracaato nenalarana!

³Uyan sonalabe o uyan unilalabe nosa seitonque nenalaratuna! Uyanlachi cosaca munaito quiratulajona! Ticatiya jelenquira quito nenalaratuna! Diosichi tsachila joto, tsanquinoca nin pantiya quilaquituna! ⁴Epe cuenta quin, seiton cuentaca quin, quitulajona! Tsantin nenatuto, Diosibe acadeseito nenanola joe. ⁵Nulari inca numa seque jera miralarae: Uyan sonalabe seitonque nenaminla, o seitonque tenca caminla, o uyanlachi cosaca munaito quiraminlari, Diosi mantananun tsachi bolonbi pewino podeilaituchunae Crístochibi. Uyanlachi cosaca munaito quiraminlari seiton jolajoe epe diosi joe tinun moldechi cale telenhiminla cuwenta. ⁶Weyanla mantimini tsanque nenano se joe timinla joe. Junto yala nene pato, encanachi timinla joe. Yala tsanlatinasiya, tina meralaquituna! Diosica merátuchi timinlaca Diosiri casticaquinato, tsanquen seitonque nenaminla jonun tenchi casticaquino jochunae. ⁷Junni tsantiminlabe tina penenatulajona!

⁸Casaleri nulachi tencabi jutsa poto, tencabi nemen jominlanue. Tsan jominlaca Miya Jesucristo nulachi tencaca jera tsen mansuwanue. Aman tsente nenaminla joto, seque nenalarana! ⁹Diosichi Tencabe mantaitori, tsarasica pato, jeralelabe sen jolajochunae. ¹⁰Miya Jesucristori chiquilaca niaque nenasa munaranunca miichique tenfelaina! ¹¹⁻¹²Seitonla nemente nenaminla cuwenta joto, epele quito nenaminla joe. Yala ticatiya nosa quinanunca panori chiquilari luranola joyoe. Junni junlaberi penenalaratuna! Seque nenalarana! yape uyanlari junlaca seitonla joeque tenhilaisa. ¹³Yari itsanque jochunae: Yalari nemente cuwenta nenalaranari, natiya miituntsan jochunae ti quilaquinanunca. Nula mantimini tseno tan cuwenta jolajochunae. Junni yalaca tseto quiranari, quirailaichunae. Jeralela yala ti seiton quilaquinanunca quiralaquichunae. ¹⁴Diosichi Pilabi junca pila chutecca joe. Itsanque chutecca joe:

Catson tsominla, mansonhilaide!

Puyaca jotonan, mansonhilaide!

Junni Cristo nulachi tencaca tsen suwachunaeque chutecca joe.

¹⁵Tencabe nenalarana! Tenca itonla cuwenta nenatuto, duque tenca tan cuwenta nenalarana! ¹⁶Amana materi tsachila duque seitonque nenaminla joe. Junni nulari lan chularatuna! Diosichi tenchi sen quinoca tenfeto chularana! ¹⁷Tenca itonla cuwenta itolajona! Miya Jesucristori chiquilaca niaque nenasa munaranunca miichique tenfelaina! ¹⁸Winan itori, lu piyayan ticaalaquichunae. Junni jun tenchi winan ituto, Diosichi Tencabe jera mantaito nenalarana! ¹⁹Nula tala Diosica canta quito, Salmo canta quilaquina! Nulachi tencabi Miya Jesucristoca se tito yaca canta

quilaquina! ²⁰Numasitiya, ti tenchitiya, Apa Diosibe acradeseilaina!
Chiquilachi Miya Jesucristochi tsachila joto, Diosibe acradeseilaina!

Unilabe sonabe niyaque nenanola jonunca

²¹Diosica respetaiminla joto, nula talanan respetaiacaato sonnalarana!

²²Sonalanan, Miya Jesucristoca meránun cuwenta, nulachi unilalacanan meralaquina! ²³Crístori chiquilachi misu cuwenta joto chiquilaca mantamin joe. Chiquila yabe se lominlari yachi puca cuwenta jolajoyoe. Junto yabe mantainlayoe. Junni jun tsanquenán unilala yalachi sonalachi misu cuwenta joto yalachi sonalaca mantaminla joe. ²⁴Junni Crístochi tsachila yabe mantainun cuwenta, sonala jun tsanquenán yalachi unilalabe numasitiya mantaino jolajoe.

²⁵Unilalari, Cristo yachi tsachilaca laquiranun cuwenta nulanán nulachi sonalaca laquiralarana! Crístori chiquilaca duque laquirato, tencachique cuwapoinue ²⁶chiquilaca Diosichi tsachila suwachun. Junto Diosichi fiquica seque meráto, chiquila mumunhinunbi seide seide jisa carichunae. ²⁷Yabe pechuno junlari tsara senla josa munarae. Man piti jutsa itonla jono joe. Jun tenchi chiquilaca se suwanae chiquila sen itobi yabe pechularasa. ²⁸⁻³⁰Meralaquede! Chiquilari Crístochi tsachila joto, yachi puca cuwenta jolajoyoe. Junni yari chiquilaca duque laquirato, seque cuidaimin joe. Junni unilalanan yalachi sonalacanan duque laquiranola joe. Tencachique pucaca laquiranun cuwenta yalachi sonalaca laquiranola joe. Yalachi sonalaca laquiraminlari tencachiquenan laquiraminla jochunae. Monantiya tencachique pucaca paituminlayoe. Chiquila tencachique pucaca duque laquirato cuidaiminlayoe Cristo yachi tsachilaca seque cuidainanun cuwenta. Junni unilala jun tsanquenán yalachi sonalaca laquirato seque cuidainola joe. ³¹Jun tenchi Diosichi Pilabi itsanque chutecca joe:

Unilalari sona cato, yalachi apaca, ayanca purato, unilabe sonabe manca puca junnique sonnalarachunaeque chutecca joe.

³²Ya fiquica seque meráno tenfe joe. Junnan Crístocanan paca joe tiyoe yabe yachi tsachilabe man junni jolajoyoeque. ³³Junni nula jeralelanan tencachique laquiranun cuwenta, nulachi sonalacanan laquiralarana! Sonalanan, nulachi unilalaca respetailaina!

Nalalaca, peyunlaca, patronlaca payinunca

6 ¹Nalalanan, Miya Jesucristochi joto, nulachi apalaca, ayanlaca meráno mantá jolajoe. Junni merán pun jolajona! ²⁻³Diosichi Pilabi itsanque chutecca joe:

Nulachi apalabe, ayanlabe sen jolajona! seque chularachun.

Yalabe sen jominlaca tote numari fecári sonnasa cariyanae tinue. Junni Diosi ya mantaca cuwanato, junca meráminlachi tenchi se queyanae tinue numari fecári sonnasa carito. Weyan mantaca meránun

tenchinan se queyanae tica josanan, ya mantári weyanlaca fécarí merántsán joe.

⁴Apalanan, ayanlanan, nulachi nalalaca sonba paito mantalaquituna! yape yalanan pailaitusa. Yalaca Miya Jesucristobe mantaito micarito, Diosichi munate payito uwa suwalaquina!

⁵⁻⁷Peyunla, meralaquede! In toteri patron tatonan, patronlachi tenchi trabajaquituminla joe. Miya Jesucristochi tenchi trabajaquilaquinae. Junto seque tenca cato quinola joe. Tsa patronlaca respetaito meralaqueina! Tica quino jonatiya, Crístochi tenchi seque quilaquina! Junni weyan peyunlari seiton jolajoe. Patronla quiralaquinasari trabajaquiminla joe yape patronla yalaca sen trabajadorila jolajoe latisa. Nulari tsan itolajona! Diosichi mantate quinato, seque tenca cato trabajaquilaquina! ⁸Nula titiya sen quinari, Miya Jesucristo nulachi beconan nantanán fe senca mancuwachunae. Peyunlachinan, patronlachinan jun tsansinan senca cuwaniquichunae. Junca mirato, seque trabajaquintsán joe.

⁹Patronlanan, nulachi peyunlaca jele potuto seque mantalaquina! Jamochi manca fécarí mantá tan Patron chue. Yari jeralelachi Patron joe. Yaberi jerale tsachila jun tsannan jolajoyoe.

Yucanbe niyaque quicaano jonunca

¹⁰Junni Miya Jesucristochi sonbabe sonban tenca ilaina! ¹¹⁻¹²Chiquilari soldadola cuwenta jolajoyoe. Yucanbe quera quicaalaquinayoe. Chiquilabe quicaaminlari tsachila itolajoe. Yucanchi mantá tan ocola jolajoe. Seiton tenca tanlaca mantaminla joe. Quiratunún seiton ocolanan jolajoe. Yalari soldadola cuwenta chiquilabe quicaalaquinae. Yucanni tenca oco joe. Yaca fe lochunni soldadola ticatiya talaranunca jera tantsán joe. Ticatiya munaranari, Diosi nulachi jera cuwachunae yape yucanca fe lolaisa.

¹³⁻¹⁷Junni chiquilari soldadola cuwenta jotori, soldadola tanunca tenca calaquede! Soldadolari fieroca manpe tsanpanan quiran quica junca awilaquimanhe. Tencatenan fierope tsanni quiranca chutelaquimanhe. Poloquin sapatoca polaquimanhe. Junsi fierope manpe tedebi talaramanhe jun fieropechi isaichun. Junni pa jominla nin chun flecha ereca jun janaminca ya fieropechi dole calaquimanhe. Junni aman misubi mantimini casco punlamanhe. Tedebiri espada tanlamanhe quicaachun. Tsanque soldadolari jera seito, fiero talari polaquimanhe quera quicaachun.

Junni nulanán soldadola cuwentanan seinola joe. Titiya jera munaranunca Diosi cuwachunae. Casalari tsarasi fiquicasiri panola joe. Tsanlatinari, ya fiero manpe tsanpa ponun cuwenta jolajochunae.

Junsi tsachilabe tsarasica joto nenalarana! Tsan ralaranari ya fieropeca tencabi chutenun cuwenta jochunae.

Junsi aman Diosichi sen fiqica miralarana! Yari pansi wepanatuto chusa carimin fiqi joe. Ya fiqica miralaranari, poloquin sapato ponun cuwenta jochunae.

Junsi Diosica tennalarana! Ya isainun fierope tanun cuwenta jochunae. Ya fieropeca fécarí munaranun jochunae. Yucan nulaca nin chun flecha erenun cuwenta nulaca seiton quisa carichi tichunae. Junni Diosica seque tennalaratori, junca wantaito fe lolaichunae.

Junsi aman Crístobe se loca joyoeque tenca talarana! Junnan ya casco ponun cuwenta jochunae. Junsi aman Diosichi Pilaca sele jera miralarana! Junnan ya nulachi espada cuwenta jochunae yucanbe quicaachun. Diosichi Tenca ya espada cuwamin joe.

Yucanlabe quicaachun yalaca jera munaranola joe. Jaatsanlaca itotori, peleilaichunae. Junni jaatsanlaca jera tan nenato, sonban jolajona!

¹⁸Junsi Diosichi Tenca ayudainasa, Diosibe numasitiya duque rocaílaina! Peleituto jerale Diosichi tsachilachi tenchi duque tenca cato rocaílaina! ¹⁹Lachi tenchi Diosibe rocaílaina! yape la jeleratuto Jesucrístoca paca sen fiqica micarisa. Ya fiquiri miitunsan jomin jotonan, amanari miintsan joe. ²⁰Ya fiqica micarimin jonun tenchi dorayoe. Crístochi mantate pamin jonun tenchinan dorayoe. Juntonan jeleratuto micarino joyoe. Junni Diosibe duque rocaílaina! la tsanquenán jeleratuto micarisa.

Saludo

²¹Aco Tíquico in pilaca nulachica tanjichunae. Yari duque laqui ranun aco joe. Jesucrístochi tenchi peleituto ticatiya seque quito nenamin joe. Yari nulachibi féto, la niyanhinanunca jera cuenta quichunae yape nula miilaisa. ²²Jun tenchi yaca erechinayoe yape nulanan miilaisa chiquila niyan jolajonunca. Yaca erechinayoe yape nulaca sonba tenca suwasa.

²³Acola, soquila, nula jeralelachi tenchi Apa Diosibe, junsi Miya Jesucrístobe rocaimin joyoe yape nulanan pansi wepanatuto chularasa. Yala nulaca laquirato fe quereisa carisa tenjae. ²⁴Chiquilachi Miya Jesucrístoca numatotiya laquiraminlachi tenchinan rocaínayoe yape Diosi nulaca laquirato duque ayudaisa.